



Sumáriu Kazu
Tribunál Distritál Baukau
Agostu 2022

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 7

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra no 36 (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	2
Artigu 20 (1) Lei Arma Brankas	Arma Brankas	1
artigu 140 KP	Omisídiu negligente	2
artigu 140 KP no 207 KP	Omisídiu negligente no kondusaun sem karta	2
Totál		7

2. Totál desizaun ne'ebé JSMP monitoriza: 7

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	6
Absolve		1
Totál		7

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun:0

B. Deskrisaun sumáriu julgamentu ba desizaun kazu sira

1. Krime omisídiu negligente no kondusaun sem karta

Nú. Prosesu : 0043/22. BCSTR
 Kompozisaun Tribunál : Singulár
 Juis : Dra Florencia Freitas
 Prokuradór : Dr. Bartolomeu de Araújo
 Defeza : Dr. Grigório Maria Lourdes de Lima
 Desizaun : Pena prizaun tinan 3 no suspende ba tinan 3 ba arguidu Duarte Filipe Carvalho, pena prizaun tinan 1 suspende ba tinan 1 ba arguidu Henrique Roberto

Iha 02 Agostu 2022, Tribunál Distritál Baukau prezide julgamentu leitura sentensa ba krime omisídiu negligente no kondusaun sein karta ne'ebé envolve arguidu Duarte Filipe Carvalho no Henrique Roberto da Costa hasoru lezadu Zefri Adelino de Sousa Gama no Estadu RDTL, iha Suku Vemasse, Posto Administrativu Vemasse, Munisípiu Baukau.

Akuzasaun Prokuradór

Prokuradór akuza katak iha 16 Abril 2022, iha oras tuku 17:00 lokraik, arguidu Duarte Filipe Carvalho, kondus motor Meo Beat ho Nú. Matrikula I.0218 TIs diresaun husi Dili no arguidu Henrique Roberto da Costa kondus motor Meo Beat ho Nú. Matrikula H.3435 TIs no tula ho lezadu. Bainhira to'o iha areia Timor Blok nia oin atu fila motor derepente arguidu Duarte Filipe Carvalho kondus motor ho velocidade maka'as soke motor ne'ebé kondus husi arguidu Henrique Roberto da Costa, rezulta lezadu monu ba rai ho kondisaun grave no konsegue ba halo tratamentu iha Sentru Saude Vemasse no transfere ba Óspital Baukau hafoin lezadu hakotu iis.

Prokuradór akuza arguidu Duarte Filipe Carvalho kontra artigu 140 (1) KP kona-ba omisídiu negligente ho moldura penál to'o tinan 4 ka multa no arguidu Henrique Roberto

da Costa ho artigu 207 KP kona-ba kondusaun sein karta ho nia moldura penál to'o tinan 2 ka multa.

Produsaun ba prova sira

Iha prosesu julgamentu, arguidu Duarte Filipe Carvalho deklara katak faktu iha akuzaun ne'e loos hotu, arguidu kondus motor iha tinan 2019, maibé to'o agora sidauk iha karta kondusaun tanba arguidu nia motor la iha, arguidu agora iha hanoin atu trata karta kondusaun, arguidu nu'udar estudante ensinu sekundaria arrepende ninia hahalok, arguidu mós ajuda ona serimonia funeral ho osan valor US\$1,600.00 no di'ak malu ona ho lezadu nia família no foin primeiravés mai hatan iha tribunál.

Entretantu arguidu Henrique Roberto da Costa deklara katak tula duni lezadu no momentu kondus motor la iha karta kondusaun, la trata tanba arguidu rasik la iha motor. Arguidu nu'udar estudante ensinu sekundaria arrepende ona ninia hahalok, foin primeiravés mai hatan iha tribunál no promete sei trata karta kondusaun.

Tanba arguidu sira konfesa tribunál presinde tiha testemuña sira.

Alegasaun finál

Prokuradór haktuir katak arguidu sira provadu komete krime ne'ebé imputa ba sira, arguidu Duarte Filipe Carvalho ajuda ona lezadu nia família hodi hala'o serimonia funeral. Tanba ne'e, husu ba tribunál atu kondena arguidu Duarte Filipe Carvalho ho pena unika tinan rua suspende ba tinan rua no kondena arguidu Henrique Roberto da Costa ho pena multa US30.00. Alende ne'e aplika mós pena asesoria ba arguidu sira labele kondus kualker motor enkuantu seidauk iha karta kondusaun.

Entretantu defeza haktuir katak arguidu sira konfesa faktu hotu iha akuzasaun, arguidu Duarte Filipe Carvalho di'ak malu ona ho família lezadu nian no ajuda ona lezadu nia família hodi hala'o serimonia funeral, arguidu sira arrepende ona sira nia hahalok. Tanba ne'e, husu ba tribunál atu fo pena ne'ebé adekuadu ba arguidu sira.

Desizaun

Depoisde avalia faktu hotu, tribunál prova katak arguidu Duarte Filipe Carvalho, kondus motor Meo Beat ho Nú. Matrikula I.0218-TLS direasaun husi Dili no arguidu Henrique Roberto da Costa kondus motor Meo Beat ho Nu. Matrikula H.3435 TIs no tula ho lezadu. Bainhira to'o iha areia Timor Blok nia oin atu fila motor derepente arguidu Duarte Filipe Carvalho kondus motor ho velocidade maka'as soke motor ne'ebé kondus husi arguidu Henrique Roberto da Costa, rezulta lezadu monu ba rai ho kondisaun grave no konsegue ba halo tratamentu iha Sentru Saude Vemasse no transfere ba Ospital Baukau hafoin lezadu hakotu iis.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira arrepende ona sira ninia hahalok, foin primeiravés mai hatan iha tribunál, nune'e tribunál konklui prosesu ne'e kondena arguidu Duarte Filipe Carvalho ho pena prizaun tinan rua suspende ba tinan tolu no kondena arguidu Henrique Roberto da Costa ho pena prizaun tinan ida suspende ba tinan ida no pena asesoria ba arguidu sira labele kondus kualker kareta no motor enkuantu seidak iha karta kondusaun.

2. Krime omisídiu negligente

Nú. Prosesu : 0089/21. BCSTR
Kompozisaun Tribunál : Singulár
Juis : Dra Sribuana da Costa
Prokuradór : Dr. João Marques
Defeza : Dr. Sidonio Maria Sarmiento
Desizaun : Pena prizaun fulan 6 suspende ba tinan 1

Iha 08 Agostu 2022, Tribunál Distritál Baukau prezide julgamentu leitura sentensa ba krime omisídiu negligente ne'ebé envolve arguidu Constantino Freitas Gayu hasoru nia oan Zeovania Freitas Gayu (idade tinan 7), iha Suku Abafala, Postu Administrativu Kelikai, Munisípiu Baukau.

Akuzasaun Prokuradór

Prokuradór akuza katak iha 28 Outubru 2021, iha oras tuku 19:00 kalan, iha Estrada Públiku area Mumana besik Sede Suku Abafala, arguidu kondus kareta vaskolante ho número matrikula 58448 TIs, no tula mós ho lezada tuur iha kareta oin. Bainhira to'o iha Estrada Públiku Mumana, kareta aat tanba prafuzu husi kruzeta monu sai nune'e arguidu para kareta iha estrada ninin parte karuk no lezada tun husi kareta arguidu foti fatuk naton kalsu tiha kareta no lezada hein iha kareta sorin parte loos. Arguidu tama ba kareta okos hodi aperta fali prafuzu kruzeta nian bainhira arguidu book hela kruzeta derepente kareta halai ba perte loos hodi dada arguidu iha kareta okos no kareta nia bak baku kona lezada nia reen-toos parte karuk rezulta bubu, ran sai husi tilun, ibun no matan no arguidu mós hetan kanek. Bainhira arguidu dolar sai husi kareta okos haree lezada ho kondisaun grave, nune'e arguidu kous lezada ba uma to'o uma lezada iis kotu.

Prokuradór akuza arguidu kontra artigu 140 (1) KP kona-ba omisídiu negligente ho moldura penál to'o tinan 4 ka multa.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok tanba ninia negligente nia oan tenke lakon vida, foin primeiravés mai hatan iha tribunál.

Alegasaun finál

Prokuradór haktuir katak arguidu provadu komete krime ne'ebe imputa ba nia, arguidu nia omisaun provoka lezada nia isin kanek, rai sai husi inus, ibun no tilun to'o iis kotu. Tanba ne'e, husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak arguidu konfesa, lezada nu'udar arguidu nia oan rasik, arrepende ninia hahalok. Tanba ne'e, husu ba tribunál atu fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak iha Estrada Públiku area Mumana besik Sede Suku Abafala, arguidu kondus kareta vaskolante ho número matrikula 58448 TIs, no tula mós ho lezada tuur iha kareta oin. Bainhira to'o iha Estrada Públiku Mumana, kareta aat tanba prafuzu husi kruzeta monu sai nune'e arguidu para kareta iha estrada ninin parte karuk no lezada tun husi kareta arguidu foti fatuk naton kalsu tiha kareta no lezada hein iha kareta sorin parte loos. Arguidu tama ba kareta okos hodi aperta fali prafuzu kruzeta nian bainhira arguidu book hela kruzeta derepente kareta halai ba perte loos hodi dada arguidu iha kareta okos no kareta nia bak baku kona lezada nia reen-toos parte karuk rezulta bubu, ran sai husi tilun, ibun no matan no arguidu mós hetan kanek. Bainhira arguidu dolar sai husi kareta okos haree lezada ho kondisaun grave, nune'e arguidu kous lezada ba uma to'o uma lezada iis kotu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, foin primeravés mai hatan iha tribunál, nune'e tribunál konklui prosesu ne'e kondena arguidu ho pena prizaun fulan neen suspende ba tinan ida. Aplika mós pena asesoria ba arguidu durante fulan neen labele kondus lai kareta.

3. Krime ofensa ba integridade fízika simples ho natureza violénsia doméstika

Nú. Prosesu	: 0021/22. BCBCV
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. João Marques
Defeza	: Dr. Sidonio Maria sarmento
Desizaun	: Pena prizaun fulan 3 suspende ba tinan 1

Iha 09 Agostu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu OdCC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 02 Feveireiru 2022, iha oras tuku 12:00 meiodia, lezada fila husi Dili tuur iha bis nia oin to'o terminal Baukau arguidu husu se ba lezada "se mak haruka tuur iha bis nia oin," ho nune'e arguidu ho lezada diskute malu arguidu tuku dala tolu iha lezada nia ulun no rasta lezada sae bemo fila ba sira nia uma. Bainhira to'o iha uma arguidu basa tan dala ida iha lezada nia hasan no inus no viziñu sira mak mai hafahe tiha arguidu no lezada.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu nega totalmente ba faktu hotu, no deklara katak iha teminal Baukau arguidu apenas bolu lezada ba sira nia uma, bainhira to'o uma derepente lezada mesak les nia faru ne'e mak arguidu sai ba liur derepente Polísia to'o hodi kaer arguidu. Arguidu ho lezada forma família dezde tinan 2010, iha oan nain haat, foin primeiravés mai hatan iha tribunál no arguidu nu'udar motorista ba kareta Baskolante ho vensimentu kada fulan US\$300.00.

Alende ne'e, lezada kontinua konfirma faktu hotu iha akuzasaun no deklara katak Depoizde akontese sira di'ak malu to'o agora moris hamutuk nafatin no arguidu la baku ona lezada.

Alegasaun finál

Prokuradór haktuir katak mezmu arguidu nega faktu hotu, maibé prokuradór nafatin tau krebilidade ba lezada nia deklarasaun ne'ebé konfirma akuzasaun sein rezerva, arguidu ninia agresaun ne'e prenze rekezitu sira husi artigu 145 KP, nune'e mezmu sira di'ak malu ona, maibé nafatin halo prevensaun atu arguidu la repete ninia hahalok hasoru kualker membru família no ema seluk iha futuro. Nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak bazeia ba produsaun prova, arguidu foin primeiravés mai hatan iha tribunál. Tanba ne'e husu ba tribunál aplika pena justu ba arguidu.

Desizaun

Depoizde avalia faktu hotu, tribunál prova katak arguidu tuku dala tolu iha lezada nia ulun no rasta lezada sae bemo, basa dala ida iha lezada nia hasan no inus.

Bazeia ba faktu provadu sira ne'e no tetu mós sirkunstánsia atenuante sira hanesan arguidu foin primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun fulan tolu suspende ba tinan ida.

4. Krime ofensa ba integridade física simples natureza violénssia doméstika

Nú. Prosesu : 0012/22. BCSIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Sidonio Maria Sarmiento
Desizaun : Pena prizaun fulan 1 suspende ba tinan 1

Iha 09 Agostu 2022, Tribunál Distrital Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JP hasoru nia oan feto, iha Munisípiu Baukau.

Akuzasaun prokuradór

Prokuradór akuza katak iha 20 Feveiru 2022, iha oras tuku 20:00 kalan, lezada nia alin mane tuda lezada nia kelen rezulta kanek, ho nune'e lezada baku nia alin. Derepente arguidu mosu mai rasta lezada nia fuuk, buti lezada nia kakorok no tuku dala ida iha lezada nia hasan parte karuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(c), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu ne'ebé imputa ba arguidu, depoisde akontese sira di'ak malu kedas, arguidu iha oan na'in sanulu resin lima, foin primeiravés halo agresaun hasoru lezada no to'o agora la baku ona lezada, arguidu nu'udar negosiante ho rendementu kada fulan US\$50.00.

Alende ne'e, lezada kontinua konfirma faktu sira iha akuzasaun no konfirma arguidu nia deklarasaun katak, depoisde akontesementu ne'e arguidu la halo ona agresaun hasoru lezada.

Alegasaun finál

Prokuradór haktuir katak mezmu sira di'ak malu ona no moris hamutuk nu'udar aman ho oan, maibé atu prevene arguidu komete tan hahalok hanesan iha futuru hodi labele hatoman-an uza violénsia hasoru lezada no oan sira seluk, nune'e husu ba tribunál atu aplika pena prizaun fulan tolu suspende ba tinan ida.

Enkuantu defeza haktuir katak arguidu konfesa faktu hotu ne'ebé konstitui ba krime, di'ak malu ona, arrepende ona ninia hahalok, foin primeiravés halo agresaun hasoru lezada, ho razaun hirak ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu rasta lezada nia fuuk, buti lezada nia kakorok no tuku dala ida iha lezada nia hasan parte karuk.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu arrepende ninia hahalok, foin primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun fulan ida suspende ba tinan ida.

5. **Krime omisídiu negligente**

Nú. Prosesu : 0004/22. LASTR
Kompozisaun Tribunál : Singulár
Juis : Dra Florencia Freitas
Prokuradór : Dr. Bartolomeu de Araújo
Defeza : Dr. Sidonio Maria Sarmiento
Desizaun : Pena prizaun tinan 2 suspende ba tinan 3

Iha 11 Agostu 2022, Tribunál Distritál Baukau prezide julgamentu leitura sentensa ba krime omisídiu negligente ne'ebé envolve arguidu Judito Bernadino hasoru lezada Febiana do Santos no Estadu RDTL, iha Suku Kom, Postu Administrativu Lautem, Munisípiu Lautem.

Akuzasaun Prokuradór

Prokuradór akuza katak iha 06 Janeiro 2022, iha oras tuku 12:00 meiodia, arguidu kondus kareta baskolante ho nú. matrikula 58525 TIs, tula sasan konstrusaun hanesan simente, arame inklui pasajeiru nain lima, arguidu sama travaun derepente kareta baku fila lezada hakotu kedas iis iha fatin akontesimentu.

Prokuradór akuza arguidu kontra artigu 140 KP kona-ba omisídiu negligente ho moldura penál to'o tinan 5.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun, arguidu mós deklarara katak lezada hela ho arguidu nia inan aman ka sira família, arguidu ajuda ona serimonia funeral ho osan valor US\$3,000 resin, di'ak malu ona ho lezada nia família, tanba sira mós sei iha relasaun família, arrepende ona ninia hahalok, foin primeiravés mai hatan iha tribunál no arguidu nu'udar kondutor ho vensimentu kada fulan US\$200.00.

Tanba arguidu konfesa, tribunál presinde tiha testemuña sira.

Alegasaun finál

Prokuradór haktuir katak arguidu provadu komete krime ne'ebé imputa ba nia, arguidu mós ajuda ona lezadu nia família hodi hala'o serimonia funeral. Tanba ne'e, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak arguidu konfesa, di'ak malu ona ho lezada nia família no ajuda ona família sira hodi hala'ó serimonia funeral, arrepende ona ninia hahalok. Tanba ne'e, husu ba tribunál atu fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu kondus kareta baskolante ho nú. matrikula 58525 TIs, tula sasan konstrusaun hanesan simente, arame inklui pasajeiru nain lima, arguidu sama travaun derepente kareta baku fila lezada hakotu kedas iis iha fatin akontesimentu.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu arrepende ninia hahalok, foin primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun tinan rua suspende ba tinan tolu. Aplika mós pena asesoria durante fulan neen arguidu labele kondus lai kareta.

6. Krime omisídiu negligente no kondusaun sem karta

Nú. Prosesu : 0051/22. BCSTR
Kompozisaun Tribunál : Singulár
Juis : Dra. Florencia Freitas no
Prokuradór : Dr. Bartolomeu de Araújo
Defeza : Dr. Sidonio Maria sarmento
Desizaun : Pena prizaun tinan 2 suspende ba tinan 3

Iha 11 Agostu 2022, Tribunál Distritál Baukau prezide julgamentu ba krime omisídiu negligente no kondusaun sein karta ne'ebé envolve arguidu Jose Cosme Rodrigues hasoru Estadu RDTL, iha Suku Gari-Uai, Postu Admistrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 03 Maiu 2022, iha oras tuku 16:20 lokraik, iha Estrada Públiku arguidu kondus motorizada tula ho testemuña Antonio da Costa Marçal husi Dirasaun Gari-Uai tun mai Wailili, bainhira to'ó iha Bahamori soke malu ho lezadu ne'ebé kondus mós motorizada, rezulta lezadu sofre kanek grave, nune'e lezadu halo tratamenru iha Óspital Baukau no kontinua transfere ba iha Óspital Nasionál Guido Valadares, maibé la consegue salva lezadu nia vida no lezadu hakotu iis iha óspital.

Prokuradór akuza arguidu kontra artigu 140 (1) KP kona-ba omisídiu negligente ho moldura penál to'ó tinan 4 ka multa no artigu 207 KP kona-ba kondusaun sein karta ho moldura penál to'ó tinan 2 ka multa.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarara tan katak depoisde problema ne'e hotu arguidu sei trata nia karta kondusaun, arrepende ninia hahalok, arguidu ajuda serimonia funeral lezadu nian hanesan fos, fahi no agua. Iha akordu arguidu sei taa karau ida hodi selebra lezadu nia serimonia kore metan, di'ak malu ona ho lezadu nia familia, foin primeiraves mai hatan iha tribunál.

Tanba arguidu konfesa tribunál presinde tiha testemuña sira.

Alegasaun finál

Prokurador haktuir katak arguidu provadu komete krime ne'ebé imputa ba arguidu, arguidu ajuda ona lezadu nia familia hodi hala'o serimonia funeral no sei ajuda tan karau ida bainhira halo serimonia koremetan. Tanba ne'e, husu ba tribunál atu kondena arguidu ho pena prizaun tinan ida suspende ba tinan ida, husu atu aplika mos pena asesoria ba arguidu hodi labele kondus kualker motor enkuantu seidauk iha karta kondusaun.

Entretantu defeza haktuir katak arguidu konfesa faktu hotu iha akuzasaun, di'ak malu ona ho familia lezadu no ajuda ona lezadu nia familia hodi hala'o serimonia funeral no sei ajuda tan karau ida hodi selebra lezadu nia koremetan, arrepende ona ninia hahalok. Tanba ne'e, husu ba tribunál atu fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu kondus motorizada tula ho testemuña Antonio da Costa Marçal husi Dirasaun Gari-Uai tun mai Wailili, bainhira to'o iha Bahamori soke malu ho lezadu ne'ebé kondus mos motorizada, rezulta lezadu sofre kanek grave, nune'e lezadu halo tratamenru iha Óspital Baukau no kontinua transfere ba iha Óspital Nasionál Guido Valadares, maibé la consegue salva lezadu nia vida no lezadu hakotu iis iha óspital.

Bazeia ba faktu provadu sira ne'e no tetu mos sirkunstánsia atenuante sira hanesan arrepende ona ninia hahalok, foin primeraves mai hatan iha tribunál, nune'e tribunál konklui prosesu ne'e kondena arguidu ho pena unika tinan rua suspende ba tinan tolu. aplika mos pena asesoria ba arguidu labele kondus kaulker kareta no motor enkuantu sidauk iha karta kondusaun.

7. Krime arma brankas

Nú. Prosesu : 0019/22. PDBAU
Kompozisaun Tribunál : Koletivu
Juis : Dra. Florencia Freitas no Dra. Jumiaty Maria Freitas
Dr. José António d. Escorial

Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Absolve

Iha 11 Agostu 2022, Tribunál Distritál Baukau prezide julgamentu ba krime arma Brankas ne'ebé envolve arguidu Manuel da Costa Fatima hasoru Estadu RDTL, iha Suku Ba'hu, Postu Administrasaun Baukau Vila, Munisípiu Baukau.

Akuzasaun Prokuradór

Prokuradór akuza katak iha 05 Janeiru 2022, iha oras tuku 13:30 meiodia, testemuña Joao Osorio liga bee ba nia natar no bee ne'e suli hotu ba arguidu nia kantareiru, bainhira arguidu ba vizita nia kantareiru haree bee nakonu iha arguidu nia kantareiru laran. Ho nune'e arguidu ho lezada diskute malu arguidu kaer katana, testemuña kaer ai-suak hodi halai ba malu arguidu foti katana atu taa testemuña, maibé la konsegue tanba testemuña baku sai tiha katana husi arguidu nia liman.

Prokuradór akuza arguidu kontra artigu 20 (1) husi Lei Arma Brankas.

Produsaun ba prova sira

Iha prosesu julgamentu, arguidu deklara katak testemuña uza ai-suak baku arguidu nia ulun no iha momentu ne'e arguidu kaer hela katana, nune'e arguidu uza katana atu satan netik mak testemuña nia liman kona katana, ho nune'e katana monu sai husi arguidu nia liman la'os arguidu mak foti sae katana hodi taa testemuña.

Testemuña Manekas Filipe Ribeiro nu'udar viziñu depoimentu katak hamrik maizumenus metro 30 haree arguidu ho testemuña halai ba malu no testemuña haree arguidu foti sae katana atu taa testemuña mak testemuña baku sai tiha katana husi arguidu nia liman.

Alegasaun finál

Prokuradór haktuir katak akuzasaun prosedente provadu no depoimentu testemuña nian katak arguidu provadu komete krime arma brankas, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza akresenta katak iha produsaun ba prova arguidu deklara katak testemuña mak foti sae ai-suak baku ba testemuña nia ulun ne'e mak testemuña defende-an laos arguidu mak foti sae katana, foin primeiravés mai hatan iha tribunál. Tanba ne'e husu ba tribunál atu absolve arguidu husi prosesu ne'e.

Desizaun

Depoisde avalia faktu hotu, tribunál prova katak arguidu kaer katana, testemuña kaer ai-suak hodi halai ba malu arguidu foti katana atu taa testemuña, maibé la konsegue tanba testemuña baku sai tiha katana husi arguidu nia liman.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu foin primeiravés mai hatan iha tribunál, nune'e tribunál konklui prosesu ne'e no absolve arguidu husi prosesu ne'e.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>